

INUIT ATAQATIGIIT

INATSISARTUNI



Nuuk, 14. januar 2013

Inatsisartut suleriaasianni § 37 naapertorlugu Naalakkersuisunut imaattunik apeqquteqarpunga.

(Inatsisartunut ilaasortaq Aqqaluaq B. Egede, Inuit Ataqatigiit)

Apeqqutit:

1. Paamiuni Imarsiornermik Ilinniarfiup illoqarfimmut allamut nuunneqarnissaa pillugu aalajangernermit tunngaviusut suut pingaarnertut tunngavilersuutigineqarpat?
2. Paamiuni Imarsiornermik Ilinniarfimmud ilinniarumallutik qinnuteqartartut ukiuni kingullerni tallimani ukiumut qassiusarsimappat?
3. Imarsiornermut Ilinniarfimmud qinnuteqartut amerlassusaannut sanilliullugu qassit ilinniartussatut akuerineqarsimappat?
4. Ukiuni kingullerni tallimani Imarsiornermut Ilinniarfimmud qinnuteqartut tamavimmik ilinniartussatut akuerineqarlutik imarsiornermik ilinniagaqalersimappat?
5. Paamiuni Imarsiornermik Ilinniarfiup ukiorpassuarni ineriartornerani pitsaasumik ineriartortitat misilittakkallu annaaneqannginnissaat Naalakkersuisut qanoq qulakkeerniarpaat?
6. Paamiuni Imarsiornermik Ilinniarfiup nuunneqartariaqarnera pillugu Sermersuup Kommunua isumaqataaneratigut aalajangiineq tunngavilerneqarpa?
7. Naalakkersuinikkut siammasissumik ingerlatseriaaseqarnissaq aningaasalersuinerlu siammasissoq Nunatsinni ingerlatsivinnut ilinniarfinnullu pisortanit aningaasalersorneqartunut aamma atortinneqartariaqarnera Naalakkersuisut isumaqatigaat?

Tunngavilersuut:

Paamiuni Imarsiornermik Ilinniarfiup illoqarfimmut allamut nuunneqarnissaa pillugu aalajangiineq ulluni kingullerni tusagassiorfitsigut sammineqarpoq. Tusagassiorfitsigut oqaatigineqartut malillugit Imarsiornermi Ilinniarfiup pisortaata tupigusuutigaa Imarsiornermik Ilinniarfiup illoqarfimmut allamut nuunneqarnissaa pillugu Naalakkersuisut aalajangiusisimanerat ilisimanagu oqaaseqarmat.

Tamanna pissusissamisut ingerlatsisoqarsimannginneranik ersiutaasoq aalassassutaammat paasinarpoq. Nunatsinni illoqarfiit angisoorsuunngitsut ilinniarfeqarnikkut inuussutissarsiorfitsigullu malunnaatilimmik allannguiffigineqartussatut siunnerfigineqartut allannguiffigineqassappata isumaqarpunga susassaqtut peqatigalugit suliaq ingerlanneqarsimasariaqarualuortoq.

Nunatsinni inuiaat siammasissumik nunaqariuseqartut nukimmik siammasissumik siammaavigineqarnissaat pisariaqarpoq. Paamiunili Imarsiornermik Ilinniarfik eqqarsaatigalugu, ilinniartoqassutsikkut ajornartorsiut pissutigalugu Imarsiornermik Ilinniarfiup nuunneqarnissaa pissappat nuussinianeq Paamiuni susassaqtut peqatigalugit suliarineqarsimanissaa minnerpaamik pisimasariaqarualuortoq. Innuttaasut paatsuungasut nassuiaanneqarnissaat pisariaqarmat, aammalu Inatsisartunut ilaasortatut paasissutissanik pissarsinissara neriuutigalugu apeqquteqaat una Naalakkersuisunut ingerlatippara.

Neriuppunga Paamiuni innuttaasut paatsuungassutigisaat, aammalu apeqqutit Naalakkersuisunut ingerlatitakka pitsaasumik nassuiarneqarumaartut.